

中國近代史資料叢刊

軍 捻

(四)

編 主 會 學 史 國 中
社 版 出 民 人 海 上
社 版 出 店 書 海 上

中國近代史資料叢刊

軍 撿

(四)

編 者

范文瀾 翦伯贊 聶崇岐

林樹惠 王其渠

中 國 史 學 會 主 編

上 海 人 民 出 版 社

上 海 書 店 出 版 社

第二部分

活動地區(三)

山東(下)

檢軍資料叢刊第四冊目錄

第二部分 活動地區(三)

山東(下).....

山東軍興紀略.....佚
名

一 一

山東軍興紀略凡五十篇總二十二卷

卷之一

羣逆擾亂天下流毒山東而起於兩廣故以粵匪名篇

粵匪一

粵匪二

粵匪三

卷之二

羣匪毒亂江豫秦楚北犯畿輔山東時號南捻而起於安徽故以皖匪名篇

皖匪一

皖匪二

卷之三

皖匪三

皖匪四

卷之四

皖匪五

皖匪六

皖匪七

卷之五

皖匪八

皖匪九

卷之六

皖匪十

皖匪十一

皖匪十二

卷之七

皖匪十三

皖匪十四

卷之八

皖匪十五

皖匪十六

卷之九

皖匪十七

皖匪十八

卷之十

起滅靡定衆無常數而皆土著故以土匪名篇

土匪一

土匪二

長鎗會匪附

卷之十一

土匪三

長鎗會匪

水南匪附

土匪四

長鎗會匪

水套匪附

卷之十二

習教諷經釋相師授起於兩縣故以邱莘教匪名篇

邱莘教匪一

邱莘教匪二

卷之十三 邱莘教匪三 邱莘教匪四

卷之十四 教匪已降復叛與上事相屬故以降衆名篇 降衆一 降衆二 降衆三

卷之十五 降衆四 降衆五

卷之十六 降衆六 降衆七

卷之十七 結黨煽掠雖與土匪無異而章疏文牘沿此稱謂故以幅匪名篇 幅匪一 幅匪二

卷之十八 幅匪三 幅匪四 幅匪五

卷之十九 與邱莘教匪同義故以鄒教名篇 鄒教一 鄒教二 鄒教三

卷之二十 據城叛亂就戮其地故以溜匪名篇 溜川匪一 溜川匪二

卷之二十一 保聚山砦重勞王師故以黃崖名篇 黃崖匪一

卷之二十二 圖練良法流而爲匪故以團匪名篇 團匪一 團匪二 團匪三

山東軍興紀略卷一之上

山東自乾隆三十九年兗州奸民王倫以清水教作亂，陷臨清、堂邑、陽穀、前大學士舒文襄、侍衛濟圖，不一月平之。至嘉慶十八年，有天里教、匪李文成、林清之變，直犯京邑，而山東曹縣、定陶皆破，騷動四省。前直隸總督那文毅、陝甘總督楊忠武遇害，湖南提督楊勤勇、山東運使劉青討平之，首尾五閱月。朝野紀載均已粲然。厥後東省民安耕鑿，枹鼓罕聞者幾四十年。迨逆粵倣擾，江表淪陷，燹火北來，又爲山東軍興之始。故此次紀略始此云。

粵匪一

粵匪洪秀全、楊秀清之肇亂也，萌蘖於道光季年。秀全籍花縣，秀清籍嘉應州，均粵東產，遷粵西潯州府桂平縣有年。三十年夏六月，合謀起事金田村，著名數巨擘，爲秀全同縣馮雲山、武宣蕭朝貴、桂平章正、和平石達開、揭陽羅大綱、湖南衡山洪大全等，而貴縣林鳳祥、陸川縣李開芳，皆與焉。秀全等羣賊由廣西蹂兩楚，下皖、吳，陷數百郡縣，汔於龜定，近時粵匪紀略詳言之，不具述。述其匪酋之擾亂山東者曰：林鳳祥、曰李開芳、曰吉文元、曰黃生才、曰曾立昌、曰陳世保、曰許宗揚。

我文宗顯皇帝御宇之三年，正月，秀全、秀清等率賊陷九江、安慶，二月陷江寧，遣偽天官正丞相林鳳祥等陷鎮江、揚州，勢駸駸北犯。文宗詔山東巡撫李德曰：『河南、安徽、江蘇接壤山東，應早防範。』德奏言：『遏賊

北竄，莫如扼守黃河。東省惟曹、單、兩縣瀕河，其餘渡口均隸江、豫，要使上下游無船可掠，必不能越河登陸。」
 奉旨：『所奏均合機宜，已飭陸建瀛、楊文定、楊以增、福濟、陸應穀照辦矣。』
時建瀛督兩江，文定撫江蘇，以增督南河，福濟督東河，應穀撫河南。

德由東昌詣曹州，履勘河隄，將官私船棧歸併曹縣劉家口、單縣董家口；令道員劉慶凱、曹中營遊擊劉玉豹、分駐曹、單，禁私渡，捕土匪；令前兗州鎮三星保、兗州鎮百勝、各選千兵聽調；德先駐曹縣。

時詔令京員毛鴻賓等回籍辦團。德遂奏請欽派山東在籍曾任京外官者，上自督撫，下至州縣，皆責令分督民團，均得旨允行。
詳另卷並詔李德察看籍辦團之前，漕運總督李湘棻、前臺灣鎮總兵呂恆安，應否調令幫辦河防。

德旋移駐兗州，奏言：『臣周歷三府，詳度形勢，自南而北，應分扼三路。東南爲郟城縣南紅花埠，接壤宿遷，派遊擊王鳳祥、知縣盧朝安、督民團謝慶昇等防守；其中路一爲嶧縣之韓莊閘，一爲嶧縣湖路之陰平。查韓莊瀕臨運河，一片平疇，漕河以南十餘里，卽江南銅山縣利國驛，又南七十里卽黃河，安徽入東必由此渡河。現在豐工漫水未消，難以徑涉，派百勝、厲恩官防此兩路，嶧縣知縣黃良楷帶兵分駐韓莊、陰平。其西南路爲曹縣劉口、單縣董口，接壤河南歸德、江南豐、沛，派三星保、劉慶凱督壽張營遊擊張遇祥駐守。』疏入，奉有『布置扼要，辦理甚好』之諭。

朝議增兵勦賊，續調山西兵三千、陝甘兵四千、交山東巡撫調遣。德奏請調回前赴河南兵三千，請停止續調吉、江官兵，再奏言：『向榮、琦善、陳金綬等所帶之兵，不爲不厚，怡良、慧成、楊殿邦、楊以增，又帶兵數千，臣

現防兗沂一帶，又有山西、陝、甘兵七千，固已師徒廣集，時向榮佩欽差大臣關防攻江甯，琦善佩欽差大臣關防與提督陳金綬攻揚州，怡良督兩江，慧成以四川總督帶兵援揚州，殿邦督漕運。臣以爲斷不可再有續調，勞苦遠方。且江南卑溼，西北之兵易致疾疫，兼以近來兵驕將懦，騷擾特甚，困官病民，莫不驚駭，是戰守未見有益，各處已受累無窮。以臣愚見，利小害大。『疏入，溫旨嘉獎。而在省之布政司劉源灝、按察司英桂、鹽運司司徒照、濟東泰道花詠春、聯銜拜疏，請派京兵一萬來東防勦，與德奏刺謬，有詔申飭。』

四月，賊留僞指揮曾立昌，此當時僞職，踞揚州，鳳祥與僞地官正丞相李開芳率二十一軍由揚北犯，軍千人，分擾安徽滁州，踞臨淮關，陷鳳陽府，欽差帶兵之內閣學士勝保引軍追之。德移軍進駐江南徐州境，先勒兵捕勦土匪，民賴以安。詳平定土匪卷奏言：『賊在揚州，東省祇防一路，以王家營爲急，徐州次之。今分擾鳳陽，東省須防兩路，又以徐州爲急。』

旣而賊黨僞丞相吉文元等，率衆由江北浦口入安徽滁、鳳、蒙、亳，合股鳳祥。五月，德回軍東境，十七日至滕縣，二十六日至曹縣，奏言：『臣前議以清江浦爲第一路，將軍托明阿扼之；王家營爲第二路，侍郎奕經扼之；三路之重與集、四路之順河集、五路之宿遷，臣督鎮將分紮。今賊竄懷、蒙，則曹、單其衝，與前說迥異，已改派三星保及留東之左江道達鏞，引兵防堵劉口河岸，遊擊王鳳祥引兵四百餘留宿遷，臣十三日回軍東境。』

先是，廷議因揚賊逼淮，徐命理藩院尙書恩華、侍衛托雲保、容照，引吉林、黑龍江勁旅南發。至是，恩華督後隊行抵東阿，德因奏留防勦。恩華遂由汶上、東平趨兗州，分盛京及直隸官兵赴防劉口。有詔，山東防勦事務，著恩華、瑞昌、李德專辦。而賊已深入豫疆，德因請敕下帶兵之署四川總督慧成、侍讀學士晉康，由清江浦

沿黃南赴汴，奏留甘肅遊擊王定堃引兵防西路曹、考交界，請將交經山西兵回扼王家營，杭州將軍瑞昌盛京兵移扼宿遷。

賊已由亳入豫之商邱境，潛出宋家集僥道，馳陷夏邑、永城及歸德府，分股由睢州犯開封圍之八日。江寧將軍托明阿、貴州提督善祿、察哈爾都統西凌阿追賊至汴，賊竄由朱仙鎮、中牟、鄭州、汜水、汾河而西。德奏言：「逆匪竄入汴梁以西中、鄭等處，撫提諸臣自必合力截擊，惟困獸猶鬪，若從中牟上下游盜決河隄，逞其水淹之毒謀，不特汴梁成澤國，且使南北岸地勢河形同時變易，天險化爲康莊，兵民均遭淪沒，其患更不可言。臣路出濟甯時，與東河督臣長臻計慮及此，並咨會撫臣陸應穀、督臣訥爾經額，嚴飭廳營逐段嚴防，勿使得遂奸計。」疏入，上韙之。

先是四月，有詔命詹事府少詹事王履謙、刑部員外郎邵懿辰、馳赴河南與東河總督長臻防黃岸，查禁官私船筏，故賊不得渡，迺繞汜水竄鞏縣之東黃河上流，奪煤糧船，渡河北，陷溫縣，逼懷慶、衛輝。懷、衛北即彰德，東北即直隸大名，可由東明、開州入山東濮州境。德再請敕下瑞昌回軍濮州，恩華軍由東明進懷、衛。迭奉文宗嘉獎，有「所籌甚妥，所見與朕適合」之諭。

六月，詔授大學士直隸總督訥爾經額爲欽差大臣，恩華、托明阿幫辦軍務，統領大河南北官兵，旋並命勝保幫辦河北軍務。

德又奏請敕下豫撫查參汜、鞏、被賊搶渡之地方文武。檄調兗、沂道厲恩官、護曹州鎮慶德、接防曹縣。於是調軍食，選將弁，定策赴援懷慶。專檄蘭山縣青陀寺巡檢程繩武爲前敵領兵官，率張遇祥勇隊五百先發，

知縣盧朝安與王定堃等率二隊繼之，親督知縣童挺、曹中營遊擊武殿奎、遊擊束得鳳等千兵，未入姚烺練勇二百續進。二十二日會師清化，進營懷慶城外原莊。賊分竄溫、密、新鄭，披猖飄忽。奉有「李德不分畛域，出境會勦，甚合機宜」之諭。

會刑科給事中張煒奏言：「河南溫縣、武陟與山西澤、潞等府祇隔太行一山。太行西連王屋，迤東則山西、河南交界，由東而北則山西、直隸交界。今據報圍賊司馬集，惟有聚而殲旃，方保無患。臣愚以爲用兵之道，必先能戰而後能守。乃近年辦軍務者，率以防堵之說，可用之於鄉邑，不可用之於都會；可備之於平時，不可恃之於臨敵。今之不圖會勦迎勦者，率自分疆界，欲儉安幸免耳！獨不思戰尙難於必勝，徒守豈足以自完？不能往而攻之，乃俟其來而堵之，氣衰智餒，不待見賊而知其無能爲矣。請敕下燕、秦、晉、豫、齊、五省督撫，各率將弁，五路圍攻之，庶幾迅掃煙氛，致勿滋蔓。」疏入，詔錄原疏下訥爾經額、舒興阿、哈芬、陸應穀、李德時舒興阿督陝甘，哈芬撫山西等，四面截擊，勿使竄入太行，致成負隅之勢。

德乃分兵交河督長臻扼木蘭店，奏言：「武陟縣木蘭店爲東南要道，苦於無兵可撥，故商之長臻，並帶原部兵勇扼之。」疏入，報可。於是德合恩、華兩軍營丹河北，府城迤北數里爲沁河，沁河迤北爲丹河。托明阿、勝保、善祿、西凌阿、董占元、都統雙祿，署河北鎮花里雅遜布，諸軍營沁南。

賊圍懷益密，知府余炳燾、知縣裘寶鏞，守禦甚力，而外兵隔不能通。德奏言：「臣營原莊離清化鎮二十里，南至丹河口四五里，離賊營六里。花里雅遜布、董占元、雙祿等在臣營後，分布三營，勢以聯絡。賊營圍繞懷城，四面林立，大股在城東北，北關臨沁兩岸均賊壘。沁北至丹河三里許，我兵渡丹攻擊，勢成背水。賊營東

西，林木縉翳，高粱蘆葦，高聳過人，恐有埋伏。故在丹北迎截者，杜賊由清化趨衛輝也。惟臣祇千八百兵勇，欲當七八千逆賊，衆寡既殊，強弱亦異，未便輕舉失機。連日整隊渡河，賊堅匿不出。清化爲糧食聚集之所，若爲賊掠，勢更披猖。仰懇天恩，俯准飭諸軍來豫夾攻，滅賊較易，不宜使有用之兵，置之閒散。』遂檄調駐守廟工之直隸藩司張集馨，駐守輝縣之長蘆運司楊需，澤州防堵之總兵郝光甲，引兵來會。初，有旨命向榮由江甯遣郎陽鎮總兵瞿騰龍將兵赴東，豫勦賊。至是，德檄催騰龍趨懷衛，毋庸入東。

七月初九日，德與勝保約，勝軍扼府東關之南，德軍扼水北關，爲夾攻計。恩軍扼丹河口，備北竄。德軍分三道進：右路從東北逼賊營，賊槍礮猛密，堅壁不出，我軍燬其木城一隅，斃紅衣賊目二，賊黨六七十；中右兩路同逼木城，殺傷賊數相等，賊氣奪。

德自正月出省視師，至今馳二千餘里，患洞洩，晝夜百數十行，不能督戰。十五日，令知府張樸引過丹河，合恩華所遣托雲保、蘊秀等步騎進西南。林落伏賊百餘，旂矛隱見。騎兵馳下，擊斬數十，步軍亦進。日中，逼木城，火器焚賊望樓，摧其大黃旂二，小黃旂十數，守賊勢卻。諸軍乘勢蹙溝，毀賊礮臺一。光甲軍由東進，抵水北關，繞向西北，山東軍由北進，太原鎮總兵烏勒欣泰軍由中進。賊深溝三重，兵勇負藁囊土填塹，賊悉力拒。相持三時久，再縱威遠礮轟之，斃衣紅賊十餘，刀矛所殺百數。次日，又分道猛攻，兵勇躍而墮者數十，均負刀矛傷。官軍礮賊營幕，烟焰翻翁，守賊不亂，又斃百數，斬女賊一，諸軍悉有斬獲。

德病殆，勺水不入，不能治軍。十八日，拜疏回東，所部悉隸勝保。八月初三日抵濟南，越二日，薨於位。布政司覺羅崇恩奏聞，文宗震悼，贈總督，加太子少保銜，賜諡恭毅。按公名德，字吉人，陝西華陰人。剛毅廉正，敢於任事。由即用

知縣游升順天府尹，旋任藩司，先擢豫撫。嘉年六十三，中外歎惜。

崇恩署巡撫事，有旨調兩湖總督張亮基撫山東。詔崇恩曰：「金陵、揚州攻圍日久，賊勢窮蹙，難保不奔竄北來。山東交界江、豫，並黃河渡口，均關緊要，不得因署任推諉。」九月，崇恩奏由東昌詣曹、兗、周巡交界江、豫邊隘，順道濟甯撫卹被災黎。初三日次莘縣。

先是，七月二十八日，鳳祥、開芳、文元諸賊爲托明阿、勝保軍所敗，懷慶解圍。賊引衆欲走，而南阻黃流，北限太行，東懾重兵，惟西路黃河、太行間有仄徑，賊乃潛趨山西，連陷垣曲、絳、曲沃諸縣，再陷平陽府，入臨汾、洪洞。勝保軍先至，收平陽。詔逮問欽差大臣訥爾經額，奪關防授勝保督諸軍，固山貝子德勒克色楞幫辦軍務。八月二十四日，詔曰：「軍律首貴嚴明，將士方能用命。近覽軍營奏報，鎮將備弁，畏葸成風，縱賊殃民，朕實痛恨！勝保勇敢有爲，朕所深悉，著頒給康熙間安親王所進神雀刀，如有遷延退縮，貽誤軍情者，副將以下先斬以聞。」

賊東竄屯留、長子，連陷潞城、黎城，再陷河南涉縣、武安，犯直隸境，屯邯鄲縣北臨洛關，連陷沙河、任、栢鄉、隆平諸縣，深入廣平、順德二府，畿疆大震。上命和碩惠親王綿愉爲奉命大將軍，科爾沁郡王湍多巴圖魯僧格林沁爲參贊大臣，督北路諸軍辦賊。而廣、順二府壤接山東臨清、東昌，臨清迤北德州爲入直大道，迤南曹州壤接大名，於是崇恩折詣臨清防堵，飭糧道姚錫華、德州城守尉豐紳額、募勇合官兵扼德州。

鳳祥等率衆自初二日始，陷趙州、樂城、藁城、晉州、深州，距德益近，僅百數十里。十六日，崇恩至德，奏言「烽火逼近，調到兵勇僅千名，除留臨清外，到者八百餘，合之滿綠各營祇千二百，請敕下勝保分兵南

來。『勝保方令都統西凌阿、副都統魁福、引騎兵出饒陽河間，分道追賊，咨參贊大臣僧郡王引兵出趙北口，任邱逆擊，檄河間副將邱聯恩引兵由劉智廟折回武強協勦，檄天津鎮道嚴戒備。』

賊由深州向東南陷獻縣，入交河，由泊頭渡河而東，旋陷滄州，趨天津，攻不能下。十月，旁陷靜海縣，分踞楊柳青、獨流鎮，相犄角。崇恩奏言：『賊勢趨東北，德防稍緩。武定北接天津，二十九日，由省移軍武定，並令文登營都司武殿奎引兵三百駐陽信。』詔責崇恩將防兵撤向武定，儻匪乘虛竄德，恐難抵禦，即臨清亦宜分兵防守，以爲聲援。當總籌全局，不可帶兵轉輾紆塗，致有疎虞。

是月，亮基履任視事，奏言：『全省額兵已調出六千餘名，存營之兵不敷分布。臣入東境，見曹南最要之區祇防兵數百，戰守皆不足恃。賊氛甚近，惟有飭各州縣募壯丁四十送省，由臣訓練，以補兵力之不足，約可得二千餘人，事平遣散亦易。』疏入，允行。亮基遂飭前湖北棗陽縣典史陳韜爲教練官，其法不合綠營步，論者頗譁。

時賊萬餘擾天津、靜海。直軍扼西北，其南則鹽山、慶雲二縣，毗連武屬陽信、海豐、樂陵。十一月，亮基督練軍趨武定，再檄州縣僱民勇，調營訓練備勦。飭歷城之候選知縣金寶符募回勇四百，聊城之何運富、荷澤武生何世恩各募勇三百赴軍前。崇恩自請引兵扼鹽、慶，障賊東竄武定之路。亮基聽之，撥官兵千五百，臨、惠、練勇五百有奇，參遊以下悉聽調遣。十四日，崇恩至鹽，營城西北二十里辛店，合兩省民團衆踰四萬，聲威甚壯。亮基調臬司厲恩官移軍德州，請敕下瑞昌駐濮州之盛京兵來德，與恩官連營柘園鎮，自請回省料量地方公事。有旨申飭。二十日，仍赴德州。

時勝保奏言：「賊勢窮思竄，請飭山東巡撫分兵二千搃堵四檔口。」有詔：「山東兵力不敷，已飭都統瑞麟領前鋒營千兵赴汝營聽調。」會上允亮基言，令瑞昌引盛京兵來德，勝保乃累檄調令赴靜海會剿，並專疏請之。

十二月，江南揚州東路營勇潰散，賊勢浸盛。北路邵伯灣頭防兵單，有詔：「山東壤接淮、徐，當嚴密設防。張亮基現赴德州，恐未能兼顧南路，應如何選將撥兵於山東、江南交界嚴防，著迅速籌辦。」亮基改令恩官引兵趨宿遷，扼山湖要隘，令護兗州鎮雙齡引兵扼利國驛，其曹、單渡口，令護曹州鎮武隆額、署濟東泰道李天錫率千兵憑河駐守。奏言：「臬司駐兵宿遷，祇能防揚賊北竄；若由安徽北竄，則徐州爲重，可否調回赴援廬州之江南提督和春駐守？」疏入，不允。

勝保復檄調崇恩赴靜。崇恩奉檄，拜疏即發，留千兵飭登中營遊擊雙慶將之，始白亮基。亮基奏言：「臣因陽信、樂陵、海豐距靜海近，無險可扼，分兵交藩司扼鹽山，附近民團聞風興起，兩省邊防嚴整。武定爲省東大道，南至穆陵關，東至登、萊二府，原野曠垠，若此處兵分力單，人心一搖，民團漸散，所關匪細。勝保靜海環寇之師已逾二萬，添此千人，攻勦未必遽有大益。」疏入，乃詔亮基曰：「業已趕到，豈能再令折回？」詔令亮基派員接統崇恩留鹽兵勇，遂令辦團之藩司王簡赴之。

次年正月初八夜，初九日黎明，靜海獨流踞賊林鳳祥等，全股五六千突圍向西，由大城縣順天府南屬二百九十里白楊橋、辛莊、分踞東城鎮、舒成村、小里文莊、管德村諸處，距新滄州西北九十里，河間府北六十里，冰雪寒淒，賊瘡多死，能行者手足膠凍，委棄兵仗。僧郡王軍追擊之，斬級千數百，營舒城之北，善祿營正東。崇恩

初十日由靜海唐官屯引軍追至，營東南徐村。十三日，勝保軍由靜道任邱進至則連營西南，旋移北臥佛堂。均甲騎待賊竄動兜擊，因賊在東城築木柵，踞大小村落數十，未能深入也。

詔下山東巡撫張亮基、河南巡撫恆春、山西巡撫英桂、防賊闖入。亮基引練軍二千餘扼景、德交界劉智廟，調王簡武定防兵分赴德平，扼接壤甯津處，至則營劉家集。

二十六日，崇營帶勇官朱某率勇擣賊巢，殺百餘賊而出，亡勇二。賊夜襲杜九村西安副都統雙某營，崇恩出軍救之。賊乘勢掩攻徐村，遊擊王用安、都司武殿奎奮擊始退，斃黃帽賊目一，餘賊二十。賊日夕出犯，諸軍皆擊勝之。

二月，鳳祥等率衆由辛莊出戰，官軍四面蹙之，斬千餘，敗退死守。諸軍乃環束城，辛莊五六里外，穿長濠困之。獲諜言，賊圖竄臨清。而初十日，賊偵濠未成，果由小里文東南西南出。十一日陷阜城縣，河間府南百四十里分踞田水莊、塔兒頭三處相犄角，復連築木城。諸軍追及之，至則先立營壘，防爲所乘。於是僧軍營西北，勝軍營三里莊之東，善軍營東北，雙軍營正東，崇軍營三里舖之北，皆縱火焚林，自十一至十五，無日不戰。十七日，克塔兒頭。城賊出小北門奔田家莊，諸軍蹙之，復入。

賊焰日衰，遣黨求救南中。初給符驗，內衣裨禱幃及簪屨中，說文，履也，屨胡瓦切。多爲官軍邏斬。繼則授口號，摩膏剪髮以相識，音志別，僞爲難民負販之屬。緣道營縣鄉團搜索益嚴，操南音者悉不得前。繼乃遣婦穉行乞，及警歌糾索，官軍皆偵知遮留之，顧不能無一二達者。